
Okrugli sto „Filozofska misao u Bosni i Hercegovini“

Udruženje za filozofiju i društveno-humanistička istraživanja „Eidos“ krajem maja je u Zenici održalo okrugli sto na kojem se govorilo o potrebi istraživanja filozofske misli u Bosni i Hercegovini. Skup se fokusirao na raspravu o zastupljenosti filozofije u Bosni i Hercegovini (kako u domenu filozofske edukacije, tako i u oblasti filozofskih istraživanja), te utjecaja svjetske filozofske misli na našu zemlju. Daka-ko, bilo bi isuviše pretenciozno da se samo na jednom skupu odgovori na mnoštvo pitanja o prisutnosti i utjecaju filozofije od njenog pojavljivanja na prostoru Bosne i Hercegovine. Zato je nakana skupa bila da utvrdi okvir budućih istraživanja, kako onih enciklopedijskih, tako i filozofsko-aksio-problemskih.

Razlog za ovakav pristup leži prevashodno u već spomenutim metodološkim ograničenjima, ali i u činjenici da u Bosni i Hercegovini ne postoji neka vrsta ocrta za enciklopediju filozofije u Bosni i Hercegovini, pa i za filozofski leksikon. Ovakva je zadaća izuzetno teška i za nju je jedino sposoban najširi krug filozofskih (ali i drugih) istraživača. Zato se rasprava fokusirala na (ot)počinjanje jednog velikog projekta “pospremanja” filozofske misli u Bosni i Hercegovini od njenog nastanka do danas. Na skupu se, iz navedenog razloga, razgovaralo o metodologiji istraživanja koje bi trebalo trajati najmanje nekoliko godina.

Prema našim saznanjima do sada se na ovakav način nije razgovaralo o poziciji i ulozi filozofije u bosanskohercegovačkom društvu, ali je krajnje vrijeme za to. O ovoj temi su na okruglom stolu govorili Miodrag Živanović, Željko Škuljević, Spahija Kozlić, Dževad Drino, Bernard

Harbaš, Aras Borić i Jasmin Kukavica. Učesnici su imali imali pionirski zadatak da krenu u “mapiranje” najvažnijih disciplinarnih, interdisciplinarnih i multidisciplinarnih tačaka nastanka, elaboracije i prisutnosti filozofske misli u Bosni i Hercegovini, te njene veze sa drugim disciplinama, posebice srodnim. Na ovaj način će se pridati dužna pažnja povijesnom razvoju filozofije u našoj zemlji.

Imajući na umu ove fakte, na skupu je zaključeno da će se istraživanje usmjeriti ka:

- historijskoj podlozi za nastanak filozofske misli u Bosni i Hercegovini;
- misliocima koji su dali značajan doprinos filozofiji i srodnim disciplinama;
- disciplinarnoj zastupljenosti pojedinih filozofskih opusa, od logike, preko ontologije i gnoseologije, pa do praktičke filozofije i estetike;
- utvrđivanju preliminarne metodologije za istraživanje filozofije u Bosni i Hercegovini, od njenog nastanka, pa do danas;
- utjecaju svjetskih filozofija na filozofsku misao u BiH;
- utjecaju bosanskohercegovačke filozofije na filozofiju u okruženju.

Održavanje ovog okruglog stola finansijski je pomogla Vlada Zeničko-dobojskog kantona. Na okruglom stolu je također zaključeno da će naredni broj časopisa *Eidos* biti tematski posvećen filozofskoj misli u Bosni i Hercegovini. Ovo je istovremeno i poziv autorima koji se bave navedenom temom da mogu dostaviti svoje radove za naredni broj *Eidosa*.